

Jemes

Nəgkiariien sə rani mə nəfe i nəkukuə

Ia nuk 48 Jemes rıməkupwən mırari nəkukuə i ia nəkukuə me pam ia Niutestamen. Jemes in piəvi Iesu. In iəmə asori riti ia nəmə asori me səvəi nakalasia me fwe Jerusalem. Nəkukuə səvənhi revən ti nakalasia me pam rıpkəvən mhə ti nousəsımwinien səvənraha kuatia. Jemes rımərai nəkukuə i mə trahatən nakalasia me ia noien səvəi nərmama səməme kamhahatətə ia Kristo. In rini mə trini mınuə nahatətəien səvəi iərmama riti ro nıpərhiēnien, tukətoni ia noien səvənhi. Jemes ramahatən nərmama ia narimnari me mını mə niemaha trəpwəh nəpiien irəha. Irəha tuhəpwəh nını ərəhaien irəha me. Irəha tuho rəmnəmwhen a ia nirəha me. Irəha tuhətui amasan ti nəfe nərəmınraha rani. Irəha tuhəpwəh nəfiəutəien irəha. Irəha tuho nətərigien səvənraha rəpwəmwis nənə mhəfwaki.

Nəgkiariien sə rakupwən

¹ Iou Jemes. Iou iərmama riti sə iakamo tukwini nari m Kumwesən mine Iesu Kristo Iərimənu səkitaha. Iakamərhi pehe nəkukuə i rauvehe tukumiaha kwənəkwus twelef səvəi nəkur Isrel hiamarə kirkiri ia tənəmtənə me. Iakani ramasan tukumiaha.

Nahatətəien mine nukurənien

1:1: Kal 1:19, Wok Me 15:23, 1Tes 1:1

² Piak me, narimnari me səpəmsəpə tuhəuvehe mho nəmisəien m kimiaha. Nəpɪn tihətoni, rerimiaha traməkeikei magien. ³ Kimiaha hiəuvəukurən raka mə nəpɪn nəmisəien ruvehe mə tro mətə sas ia nahatətəien səkimiaha, noien nəha tro hiəuvehe mhəskai mwi ti nərer əknekinien ia nahatətəien səkimiaha. ⁴ Nənə kimiaha tihaməkeikei mhərer əknekin ia nahatətəien səkimiaha ia nəpɪn me mheste pen nəpɪn sə tihəuvehe mhatukwatukw mhəmwhen, nari riti mwi ko ripkiwən təni mhə kimiaha. ⁵ Trini minuə kimiaha riti nukurəniən səvənhi rəpwəh nəmwhenien, ramasan mə in trəres Kumwesən sə rauvei pen auər a narimnari me m nərmama me pam mipkətə ərəha mhə irəha. Nənə Kumwesən trasitu irə, mo nukurəniən səvənhi ruvehe məpwəmwis mwi. ⁶ Mətə nəpɪn iərmama nəha trəres i, in traməkeikei mahatətə ia Kumwesən, məpwəh nəmkiəmkiien, ti nəri nə mə iərmama sə raməmkiəmki nari rəmwhen ia peiau ia təsi nīmətəgi raməpwi raməsəsau əpnəpen. ⁷ Iərmama iamɪnhi ko rəpwəh nətəien mə truvehi nari riti ruku pen ti Iərimənu, ⁸ ti nəri nə mə nətərigien səvənhi ro kəru ko ripkərer mhə ia nari kuatia ia noien me sə in ramo.

Iərmama auər a mine iərmama sə nautə səvənhi rasori

⁹ Trini minuə piəvtaha riti nautə səvənhi riwən, ramasan mə rerɪn tragien nəpɪn Kumwesən truvehi utə in. ¹⁰ Rəmwhen a mwi trini minuə piəvtaha riti nautə səvənhi rasori, ramasan mə

rerin tragien nǝpɪn Kumwesən truvehi irapw in. Iakani iamɪnhi irə ti nǝri nǝ mə iǝrmama nautə sǝvənhi rasori traukei mǝmwhen ia tihi nurhi. ¹¹ Nǝpɪn meri rutə mǝpnǝpan pik mǝnhi nurhi, nurhi trɪmhɪə, tihin traukei mǝsas, namasanien sǝvənhi triwən. Ia noien nǝha rǝmwhen a mwi iǝrmama nautə sǝvənhi rasori. Nǝpɪn ramavən mamowok sǝvənhi, in tremhə, nautə sǝvənhi triwən.

Kumwesən ko rɪpko mhə iǝrmama rɪmwei ia nǝrəhɪen

¹² Nǝpɪn nǝmisɪen truvehe mə tro mətə sas ia nahatətɪen sǝvəi iǝrmama riti, trɪni mɪnuə iǝrmama nǝha ramǝrer əknekɪn ia nahatətɪen sǝvənhi, rerin tragien. Nǝpɪn nǝmisɪen nǝha traraka irə, Kumwesən truvei pen nɪmɪruien rerin min rǝmwhen kǝfəfau pen kǝfəfau sǝvəi nɪsɪaiien m iǝrmama riti. In rɪno raka promes mə truvei pen nɪmɪruien rerin nǝha m nǝrmama mǝ sǝmǝme hokeikei in. ¹³ Trɪni mɪnuə iǝrmama riti rɪregi noien ǝrəha ravi nətǝrɪgien sǝvənhi, iǝrmama nǝha trǝpwəh nɪniien mə, “Kumwesən rǝrhi pehe nǝri i, mavi nətǝrɪgien sǝiou irə mə takɪmwei.” In trǝpwəh nɪniien nǝgkɪariien nǝha ti nǝri nǝ mə noien ǝrəha ko rɪpkɪvi mhə nətǝrɪgien sǝvəi Kumwesən, nǝnə rɪpko mhə noien sǝvəi Kumwesən mə trɪvi nətǝrɪgien sǝvəi iǝrmama irə. ¹⁴ Mətə iǝrmama trɪregi noien ǝrəha ravi nətǝrɪgien sǝvənhi nǝpɪn rerin atukw ramrhi noien ǝrəha sə in rokeikei mə tro. In nǝ ravi nətǝrɪgien sǝvənhi mamiri raka in. ¹⁵ Nǝpɪn iǝrmama rerin rɪnamrhi noien ǝrəha sə in rokeikei pik mə tro, noien ǝrəha

nəha truvi nətərigien səvənhi mo in rīmwei. Nənə noien ərəha truvehə masori ia nimiruien səvənhi mukuə kwənkwan nə iərmama nəha tremhə. ¹⁶ Piak keikei me. Kimiaha tihəpwəh nəseniien iərmama riti reikuə ia kimiaha. ¹⁷ Narimnari me pam səməme hamasan mhatukwatukw kauvei pehe m kitaha kamhəuku pen fwe ia neiai. Kumwesən ramərhi irapw pehe narimnari me nəha. In rino meri, mine məkwə, mine kəməhau me ia nimagouagou. Noien səvənhi ko rəpwəh nərariien, uə in ko rəpwəh nərariien muvei pehe təkutan m kitaha, məpwəh kitaha samarə ia nəpitəvien. ¹⁸ Tɪ nəri nə mə Kumwesən rokeikei in rərhi pehe nəgkiariien sə ro nɪpərhiienien. Nəgkiariien nəha ro kitaha səuvehe mhəno nəkwərəkəwərha me səvənhi. Kumwesən ro iamɪnhi irə mə ia narimnari me pam in rino kitaha tsəmwhen ia kwənkwai nei me sə vi tukukupwən kesi.

Kimiaha tihaməkeikei mhətərig ia nəgkiariien səvəi Kumwesən mho nəfe rani.

¹⁹ Piak keikei me, rerimiaha tramrhi nəgkiariien i. Nəpɪn kimiaha hiaməgkiari, tihaməkeikei mhətərig amasan, mhəpwəh nəgkiari akwauakwien. Kimiaha tihəpwəh nəseniien niemaha rəpi akwauakw kimiaha, ²⁰ tɪ nəri nə mə niemaha səvəi iərmama ko ripkukuə pehe mhə nukwan sə ratukwatukw rəmwhen Kumwesən rokeikei. ²¹ Kimiaha tihaməkeikei mhərarki raka noien me pam səməme həkemik mine noien ərəha me nəha həpik ia nimiruien

səkimiāha. Tiheiwaiu mhətərig amasan ti nəgkiariien nəha kinəpwei rəmwhen ia nuni nari ia rerimiāha. Nəgkiariien nəha rukurən nuvehimīruien kimiāha. ²² Mətə tihaməkeikei mho nəfe nəgkiariien nəha rani. Trini minuə kimiāha hiamətərig a irə, hiameikuə atukw a ia kimiāha. ²³ Trini minuə iərmama riti ramətərig a ia nəgkiariien səvəi Kumwesən, mətə rəpwəh noien nəfe rani, in rəmwhen ia iərmama sə ramətə nənimen ia klas. ²⁴ Nənə nəpīn rətə raka nənimen, məpwəh mevən, təkwtəkwwuni a mwi renouenou mə nənimen rīnəfo irə. ²⁵ Mətə iərmama sə raməti pen ia loa atukwatukw nəha sə rameivinari ia nərmama, nənə raməti pen mamətə ia nəpīn me, mīpkō mhə in iərmama sə ramətərig a nənə menouenou i, mətə in ramo nəfe loa nəha rani, iərmama sə ramo iamīnhi Kumwesən trəkwein amasan irə ia nəfe wok səvənhi ramo. ²⁶ Trini minuə iərmama riti rerīn ramrhi mə in iərmama səvəi nəfwakiien, mətə rīpkətə amasan mhə ti nəfe nəramīn ramīni, in rameikuə atukw a irə. Nəfe nari in ramo mamsiai Kumwesən irə ramo auər a. ²⁷ Kumwesən in Tata səkītaha. Noien i nəkur əfwaki me tuho mhəsiai in irə sə ratukwatukw məmher ia nənimen, in i irəha tuhaməkeikei mhasitu ia nīpran me səməme nərman me səvənraha hemhə mhəpwəh irəha, mhasitu ia nəkwərhakwərha kemhə təni irəha, nənə mhətui amasan mwi ti nīmīruien səvənraha mə noien ərəha me səvəi tīprənə i tuhəpwəh noien irəha həuvehe mhəmkemik.

1:22: Mat 7:26, Rom 2:13

1:25: Rom 8:2, Jem 2:12, Jon 13:17

1:26: Sam 34:13, Sam 141:3

2

Kimiaha tiho rəmnəmwhen a ia kimiaaha me

¹ Piak me, kimiaaha hiənahatətə raka ia lərimənu asori səkitaha Iesu Kristo. Ro pen kimiaaha tihəpkoḡəiti mhə ia kimiaaha me, mətə tiho rəmnəmwhen a. ² Trini minuə kimiaaha hiəusəsəimwɪn kimiaaha me, nənə iəmə kəru krouuvnimwə pehe, riti tinari səvənhi ramasan, ruvei pen rig kino ia kol, riti nautə səvənhi riwən, tinari səvənhi rəpəruəpəruə, kimiaaha tihaməkeikei mhə rəmnəmwhen a ia nirau. ³ Rərəha mə hiəsiai iəmə tinari səvənhi ramasan, mhəni pen tukwe in mə, “Uvehe, məkure i ia kwopun amasan ikɪn,” mhəni ərəha iəmə i nautə səvənhi riwən mə, “Ərer pen fwe,” uə “Əkurei irapw ia nisuk.” ⁴ Nəpɪn kimiaaha hiamə noien me iamɪnhi, hiətəni mə kimiaaha nepwɪn hiasori mhəpi raka kimiaaha nepwɪn. Nənə hiaməkiri nərmama ia nətərigien ərəha səkimiaha. ⁵ Piak keikei me, hətərig ro. Kumwesən ruvərɸi raka nərmama nautə səvənraha riwən ia təkure tiprənə i mə nahatətəien səvənraha triskai. In ruvərɸi raka mwi irəha mə tuhəuvnimwə pen ia nitətə sə in ramərimənu irə. Nitətə nəha Kumwesən riməni mə nərmama səməme hokeikei in tuhəuvnimwə pen irə. ⁶ Mətə kimiaaha hiamətə ərəha a nərmama me nəha nautə səvənraha riwən. Mətə nisimə nəha kamho nəmisəien m kimiaaha? Nisimə nəha kamhəvi irapw kimiaaha ia kwopun kaməkiri nəgkiariien ikɪn? Kwa nərmama me nəha nautə səvənraha rasori kamho iamɪnhi irə. ⁷ Irəha nəha kamhəni ərəha nahag asori səvəi Iesu, nəhag

sə Kumwesən rɪnəkwein kɪmɪaɦa ɪrə. ⁸ Mətə loa asori səvəi ɪərɪmənʉ səkɪtaha raməmæk ɪa Nəkukuə ɪkinan rani mə, “Tikaməkeikei mokeikei pɪam rəmwhen ikokeikei atukw ik.” Trɪni mɪnuə kɪmɪaɦa hɪamesi pen pərɦien nəgkɪarɪien nəɦa, hɪamo noien amasan. ⁹ Mətə trɪni mɪnuə hɪamopəiti ɪa nərmama nepwɪn, hɪamo noien ərəɦa, nənə loa nəɦa tro pui kɪmɪaɦa, mɪni mə kɪmɪaɦa nərmama sə hɪamərui Loa. ¹⁰ Trɪni mɪnuə ɪərmama riti ramarkut mə tresi pen pam nəfe Loa səvəi Kumwesən rani, mətə rapəti ɪa nəgkɪarɪien kuatia a, rəmwhen mə in rɪnərui nəgkɪarɪien me pam ɪa Loa nəɦa. ¹¹ Kumwesən nəɦa sə rɪməni mə, “Tikəpwəh nakresien pran səvəi ɪərməpə,” Kumwesən nəɦa in nəɦa rɪməni mwɪ mə, “Tikəpwəh nousi əpuneien ɪərmama.” Trɪni mɪnuə ɪkəpwəh nakresien pran səvəi ɪərməpə, mətə ɪkamousi əpune ɪərmama, ɪk ɪərmama ɪkamərui ɪɦi Loa səvəi Kumwesən. ¹² Nəgkɪarɪien me səkɪmɪaɦa mɪne noien me səkɪmɪaɦa tuhaməkeikei mɦesi pen loa sə rameivɪnari ɪa kɪmɪaɦa. Kɪmɪaɦa tɪhaməkeikei mɦo ɪamɪnɦi ɪrə tɪ nəri nə mə Kumwesən trəkiri kɪmɪaɦa ɪa loa nəɦa. ¹³ Trɪni mɪnuə ɪərmama riti rəpwəh napɪien nərmama nəpɪn raməkiri ɪrəɦa tɪ noien me səvənraɦa, Kumwesən trəpwəh napɪien in nəpɪn trəkiri in tɪ noien me səvənɦi. Napɪien tɪ ɪərmama ramasan məpi raka nəkirɪien in tɪ noien me səvənɦi.

Nahatətəien sə rɪpko mɦə nari riti ro nəri auər a ɪ

2:8: Mat 19:19, Kal 5:14 **2:9:** Dut 1:17 **2:10:** Mat 5:19
2:11: Eks 20:13-14, Rom 13:9 **2:12:** Kal 6:2, Jem 1:25, 1Tes 2:16 **2:13:** Mat 5:7, Mat 18:32-35

14 Piak me, trəfo masitu ia iərmama riti trini minuə rani mə ramahatətə ia Iesu Kristo mətə in ripko mhə nari riti, ko nahatətəien sə ro iamihni irə ruvehimiru in? Rekəm! 15 Trini minuə piəvtaha riti uə kətirimətaha riti ramarə ərəha tinari səvənhi riwən nəveginien sənəni rəpwəh nəmwhenien, 16 tihaməkeikei mhəuvei pen tinari uə nəveginien min. Trini minuə hiəpwəh nuvehi penien nari riti min, mhəni pen a tukwe in mə, “Evən ia nəmərinuien, məpwəh nəkwieien, məni amasan nari,” nəgkiariien nəha trəfasitu irə? Ro nəri auər a i. 17 Ia noien nəha rəmwhen a mwi nahatətəien əpa trini minuə ripko mhə nari riti remhə. 18 Mətə iərmama riti trəgkiari iamihni irə mini mə, “Ik səim nə nahatətəien, mətə iou səiou nə noien me.” Itə. Ko iko ro iakətoni nahatətəien səim mətə ipko mhə nari riti? Rəknekın. Mətə iou iakukurən noien ikətoni ia noien me səiou mə iakamahatətə pərhiēn. 19 Ik ikani nīpərhiēnien ia Kumwesən mə in kuatia a. Ramasan. Nəremhə me irəha mwi kamhəni nīpərhiēnien irə, nənə kamhəhekir mamhətəmnimwin. 20 Ik iərmama ikreirei nari. Nahatətəien sə ripko mhə nari riti ro nəri auər a i. Ikokeikei mə tako ikətoni mə nəri nəha ro nīpərhiēnien i? 21 Rerim trirhi ro kaha kupwən səkitaha Epraham. In ratukwatukw ia nəmri Kumwesən ia noien me səvənhi uə rekəm? Ouəh, Kumwesən rīməni mə in ratukwatukw ia nənimen nəpın rīnaməmrutə tini, Aesak, ia təkure nifatə. 22 Ikətoni mə nahatətəien səvəi Epraham mine noien me səvənhi krauo nari kuatia. Noien me səvənhi hənə nahatətəien səvənhi ruvehe matuk-

2:14: Mat 7:21 **2:15:** 1Jon 3:17 **2:17:** Jem 2:20,26 **2:18:** Kal 5:6
2:19: Mat 8:29 **2:21:** Jen 22:9-12 **2:22:** Hip 11:17-18

watukw məmwhen. ²³ Nənə nəgkiariien i səvəi Nəkukuə Ikinan ruvehe mukuə. Rini mə, “Epraham rini nīpərhiēnien ia Kumwesən. Nənə ti nəri nə mə in rahatətə iamīnhi, Kumwesən rətə in mə in ratukwatukw ia nənimen.” Kurirə irə kəkwein Epraham mə in riti nə Kumwesən. ²⁴ Ro iamīnhi irə hiamətōni mə iərmama in ratukwatukw ia nəmri Kumwesən ia noien me, rīpko mhə ia nahatətəien əpa.

²⁵ Rəmwhen a mwi rerimīaha trīrhi ro prən nəha Rehap, pran səvəi suatuk. In ratukwatukw ia nəmri Kumwesən ia noien me səvənhi uə rekəm? Ouəh, Kumwesən rīmāni mə in ratukwatukw ia nənimen nəpīn prən nəha rīnəsəvər ia nīmwə səvənhi ti iəmə kəru sə kīnərhi pen irau krouevən rouətə afafa Jeriko. Nənə kurirə irə rərhi pen irau krauesi pen suatuk əpə iti rauevən. ²⁶ Nīpwrai iərmama neiahagien riwən irə ruvamhə. Ia noien nəha rəmwhen a mwi nahatətəien əpa sə rīpko mhə nari riti remhə.

3

Ik tikətui amasan ti nəfe nərəmīm rani

¹ Piak me, rərəha mə kīmīaha hiəpīk hiəuvehe mho nahatən me ia kīmīaha. Kīmīaha hiəukurən mə nəpīn Kumwesən trəkiri kīmaha nahatən me tro rīskai mwi m kīmaha məpi raka nərmama me nepwīn. ² Nəpīn rīpīk kītaha pam samapəti, mətə iərmama sə rəpwəh nəfwəkourien ia nəgkiariien səvənhi in iəmə atukwatukw pərhiēn. Iərmama sə raməkoui amasan nərəmīm rīməru tukwe in ti nəkouiien mwi nīpwran me pam. ³ Kītaha

2:23: Rom 4:3,9,22, 2Kron 20:7, Aes 41:8

2:25: Hip 11:31

2:26: Jem 2:17 **3:1:** Luk 12:47

saməuvei pen fraetel ia nəkwai hos me mə tuho nəkwataha. Ia noien nəha saməkoui nīpwrai hos me pam. ⁴ Hətə ro mwi nītətə me. Nīpwrānraha rasori. Nīmətagi asori me kamhəpwi irapw irəha. Mətə nəri sə raməkəkini irəha irə rouihi a. Kamhəuvən ia kwopun pəku iəmə sə raməkəkini nītətə rokeikei. ⁵ Ia noien nəha rəmwhen a mwi nəramitaha rouihi ia nīpwrataha, mətə raməfiutə pīk nari. Rerīmīaha tramrhi nəri. Nukumheəv ouihi rukurən nurkwumenien napw asori sə ramahi əmwesi nei mhiə me rīpīk. ⁶ Nənə nəramitaha rəmwhen ia napw. Rərəha anan ia nīpwrataha me pam, mamō nīpwrataha me pam ruvehe məmkekīk. Kwopun napw asori rauək ikin ramhiai pehe napw ia nəramitaha. Nənə nəramitaha ramhiai pen napw ia nīmīruvien pam səkitaha. ⁷ Nəri əprmin me pam həukurən nuveheien mhəmweimwei. Nərmama me həno raka noien nəha ia nīrəha me pam, menu me, uə snek me, uə nəmu me. ⁸ Mətə iərmama riti riwən ko ro nəramin ruvehe mīmweimwei. Nərami iərmama nəri ərəha riti ko rīpkapwis mhə. Rukuər ia nəri akonə sə ramousi əpune iərmama. ⁹ Ia nəramitaha saməgnəgini Kumwesən Tata səkitaha.^a Nənə ia nəramitaha mwi saməkwein ərəha ia nərmama Kumwesən rino irəha həmwhen irə. ¹⁰ Nəkwataha kuatia, krouəgnəgini Kumwesən irə, nənə krouarə rouəkwein ərəha mwi ia nərmama. Piak me, noien me nəha mə trīpko mhə iamīnhi. ¹¹ Rəfo, ia nəmri nui kuatia ko nui mīne təsi irau pəri krouapour? ¹² Rəfo, piak me, ko niemīs rukuə nuk-

3:6: Mat 12:36-37, Mat 15:11,18-19 **3:8:** Rom 3:13 **3:9:** 1Kor 11:7 **a 3:9:** Nəgkiariien səvəi nəkur Kris kupwən rini iamīnhi irə mīnuə 'Iərimənu Tata səkitaha.'

wai olif, uə nei nəha krep rukuə nukwai niemis? Rekəm! Rəmwhen mwi kwopun kakwəhi təsi ikin ko kɪpkukwəhi mhə mwi nui ikin.

Nukurənien sə ruku pen ia neiai

¹³ Sin ia kɪmiaha rukurən nari, uə nukurənien səvənhi rəpwəmwis? Iərmama nəha traməkeikei mo noien amasan, məpwəh nəfiətəien in. Noien nəha trahatən pen mə in rukurən pərhien nari.

¹⁴ Mətə trini minuə rerimiahaha ramrhi ərəha kɪmiaha me uə hiamətərig atukw a ia kɪmiaha me mə tihəfo mhəutə mhəpi raka nərmama nepwɪn, kɪmiaha tihəpwəh nəfiətəien ia kɪmiaha me mə hiəukurən nari, ti nəri nə mə ia noien nəha hiameikuə a mhəpwəh niniien nɪpərhiēnien.

¹⁵ Iərmama sə ramo noien nəha rɪpkuvehi mhə nukurənien sə ruku pen ia neiai, mətə in ruvehi nukurənien sə ruku pen ia tiprənə i. Nənimwɪn Ikinan rɪpkuvei pen mhə nukurənien nəha min, mətə ruku pen ia nəremhə me. ¹⁶ Nəpɪn nərmama rerɪnraha ramrhi ərəha irəha me uə irəha kamhətərig atukw a ia nirəha mə tuhəfo mhəutə mhəpi raka nərmama nepwɪn, ia kwopun kamharə ikin tihətoni kamho pɪpɪri ia narimnari me, mamho mwi noien ərəha me pam. ¹⁷ Mətə iərmama sə ruvehi nukurənien nəha ruku pen ia neiai noien səvənhi ropə. Nəri sə rakupwən nətərigien səvənhi rəmher. In iərmama sə raməmri nəmərɪnuien. Noien səvənhi ramasan məpou. In ramsiai nətərigien səvəi nərmama me səpəmsəpə. In ramapi pɪk ti nərmama.

Nukurənien səvəi iərmama nəha rukuə nukwan rɪpɪk sə ramasan ia nɪmɪruien səvənhi. In ramo

rəmnəmwhen ia nərmama me pam, məpwəh neikuəien. ¹⁸ Nəpɪn nərmama səməme kamhəmri nəmərinuien kamharə ia nəmərinuien rəmwhen mə kamhəpwei nuni nari riti. Nuni nari nəha trutə mukuə kwənkwan nə narəien sə ratukwatukw.

4

Iərmama sə rokeikei pik noien səvəi tɪprənə i

¹ Nəfe nəha nukune naruagənien me mine nukune nəvisəien me səkimiaha? Rosi in i uə rekəm? Ia rerimiaha kimiaha hiokeikei pik mə tihəregi ramasan ia narimnari me pam, nənə noien nəha ramo kimiaha hiaməvisə ia nəpɪn me.

² Hiokeikei nari riti, mətə rəknekɪn tɪ nuvehien, ro pen hiouisi əpune iərmama tukwe. Rerimiaha rakres nari riti səvəi iərməpə, mətə rəknekɪn tɪ nuvehien, ro pen hiəvisə, mamharuagən tukwe. Kimiaha hiəpwəh nuvehien nəfe hiokeikei, tɪ nəri nə mə hiəpkəres pen mhə Kumwesən i. ³ Trini minuə kimiaha hiəres pen i, hiəpwəh nuvehien, tɪ nəri nə mə hiaməres, mətə nətərigien səkimiaha rɪpkatukwatukw mhə. Narimnari me nəha hiaməres pen Kumwesən mə truvei pehe m kimiaha, hiokeikei mə tihəuvehi nənə mhəuvehi nəmri nari sə nətərigien ərəha səkimiaha rokeikei.

⁴ Kimiaha hiamwhen prən i sə raməpwəh səvənhi iərman mamesi pen iərman əpə. Rəfo? Rosi kimiaha hiəreirei mə iərmama sə rokeikei pik noien me səvəi tɪprənə i truvehe iərmama sə raməmwəki Kumwesən? Ro iamɪnhi irə trini minuə iərmama riti ia kimiaha rinuə trokeikei pik

noien me sǝvǝi tǝprǝnǝ i in trǝmwǝki Kumwesǝn.
⁵ Rǝfo? Rosi kǝmiaha hiǝreirei nǝgkiariien i
 ramǝmak ia Nǝkukuǝ Ikinan? Rani mǝ,
 “Nǝnimwǝin nǝha Kumwesǝn rǝnǝmri ramǝmak ia
 reritaha rokeikei pik
 mǝ kitaha sǝvǝi Kumwesǝn ǝpa.”

Nǝnǝ nǝgkiariien nǝha rǝpkǝ mhǝ nǝri auǝr a i.
⁶ Mǝtǝ Kumwesǝn ramǝriari pehe namasanien m
 kitaha rasori pik. Ro pen Nǝkukuǝ Ikinan rani mǝ,
 “Kumwesǝn rerǝn rǝpkǝgien mhǝ tǝ nǝrmama
 sǝmǝme kamhǝfiǝutǝ ia nirǝha,
 mǝtǝ ramǝriari pen namasanien sǝvǝnhi
 m nǝrmama sǝmǝme kamhǝuvehi irapw
 irǝha.”

⁷ Ro iamǝnhi irǝ kǝmiaha tihamǝkeikei mheiwaiu,
 mharǝ tegǝn Kumwesǝn, mhǝni rekǝm tǝ Setan,
 nǝnǝ in trǝpwǝh kǝmiaha map. ⁸ Kǝmiaha
 tihǝuvehe ipaka tǝ Kumwesǝn, nǝnǝ in truvehe
 ipaka tukumiaha. Kǝmiaha nǝkur ǝrǝha me
 tihamǝkeikei mhǝrkwerǝg. Kǝmiaha nǝtǝrǝgien
 sǝkǝmiaha ro kǝru tihamǝkeikei mhǝ rerǝmiaha
 rǝmher. ⁹ Ramasan mǝ tihǝregǝ rǝrǝha,
 mhasǝk, mhǝkweǝn ǝpwǝmwǝs. Pwǝh narǝsien
 sǝkǝmiaha ruvehe mo nasǝkien irǝ. Pwǝh
 nagǝnien sǝkǝmiaha ruvehe mo nǝpǝuien irǝ.
¹⁰ Kǝmiaha tihamǝkeikei mheiwaiu mhǝnimwi
 nukurhumiaha ia nǝmri Kumwesǝn, nǝnǝ in
 truvehi utǝ kǝmiaha.

Kǝmiaha tihǝpwǝh nǝni ǝrǝhǝien kǝmiaha me

¹¹ Piak me, kǝmiaha tihǝpwǝh nǝni ǝrǝhǝien
 kǝmiaha me. Iǝrmama sǝ rani ǝrǝha piǝvni uǝ rani

piävni mə ramo noien ərəha, iərmama nəha ramini ərəha Loa səvəi Kumwesən, mamini mə Loa nəha rəpwəh nəmwhenien. Mətə nəpın ikani loa nəha mə rəpwəh nəmwhenien, ikəpwəh noien nəfe Loa nəha rani, mətə ikamo ik iəmə sə ikasori ia Loa nəha. ¹² Iərmama kuatia in əpa rauvehi nasorijen mə trəmri Loa, məkiri noien me səvəi nərmama, nənə mərpwın tai noien me səvənraha. Iərmama nəha in nəha rauvehimiru nərmama, mamouraha mwi irəha. Mətə ik sin i? Rəfo ikaməkiri noien me səvəi piam?

Ik tikətigite ia Kumwesən ia nəfe tiko trakwakwi tineis mine

¹³ Tihətərig ia nirak kımiaha səməme hiaməni mə, “İpwet uə trakwakwi tsəuvən ia taon i uə taon nəha, mharə nuk kuatia, mho pisnes fwe ikin, mhəuvehi mane.” ¹⁴ Kımiaha tihəfukurən nəfe trımwei irapw trakwakwi? Nəfe nəha nımıruien səkımiaha? Kımiaha hiəmwhen ia nise napw sə ruvehe nəpın ouihi a nənə marə miwən mwi. ¹⁵ Mətə nəgkiariien sə ratukwatukw mə kımiaha tihəni ro iamınhi irə, “Trini minuə nəkwai Kumwesən pərhiən, tsarə mho narimnari me i uə narimnari me nəha.” ¹⁶ Mətə ipwet mine kımiaha hiaməgkiari mamhəfiutə ia kımiaha. Nəgkiariien sə raməfiutə nərmama iamınhi rərəha. ¹⁷ Iərmama sə rukurən nəfe noien ratukwatukw mə tro, mətə in rəpwəh noien, in ramo nərəhaien.

5

Nəvəhagien ramevən ti nərmama nautə səvənraha rasori

¹ Kimiaha nərmama nautə səkimiaha rasori tihətərig ia nirak. Ramasan mə kimiaha tihəsək mhəkwein əpwəmwis ti nəmisəien me nəha səməme kamhəuvehe tuheste kimiaha. ² Nautə səkimiaha ruvəmərir. Uvnə me hənani raka tinari me səkimiaha. ³ Kol mine silva səkimiaha rinopwei raka. Nopweiiən nəha səvənraha trahātən pen mə nīpərhienien kimiaha hiəno noien ərəha, nənə trahi nīpwramiaha rəmwhen ia napw. Ipaka nəpīn sampam i, mətə kimiaha hiamoeite ihi nautə me səkimiaha. ⁴ Hətə ro! Nərmama me səməme kamhowok həno raka wok fwe ia nəmhien me səkimiaha, mətə kimiaha hiəpwəh nərəkuien irəha. Nərəkuien nəha səvənraha ramaşək mani mə kimiaha hiəno noien ərəha. İərimənu sə rauvehi nışkaiien me pam ruvəregi raka ia nəkwəregin naşəkien səvəi nərmama səməme kamhesi nəveginien sə ruvəmruə fwe ia nəmhien me səkimiaha. ⁵ İa tīprənə i kimiaha hiəpwəh nişeseien. Nəfe nautə me kimiaha hiəkeikei mə tihəuvehi hiaməuvehi. Hiaməkwməni atukw a kimiaha hiaməşisi mhəmwhen ia kau me səməme rīpko mhə tui kousi əpune irəha. ⁶ Kimiaha hiaməkiri nəmə atukwatukw me mə tuhaməkeikei mhəmha. Hiamousi əpune irəha, nənə həpwəh nəşisəgien kimiaha.

Nətərigien səkimiaha trəpwəmwis

5:1: Luk 6:24 **5:2:** Mat 6:19 **5:4:** Dut 24:14-15, Mal 3:5

5:5: Luk 16:25, Jer 12:3, 25:34

⁷ Piak me, kímiaha tihaməkeikei mho nətərigien səkímiaha rəpwəmwis, mamheitenhi mheste nuveheien səvəi Iərimənu səkítaha. Hətoni ro iərmama sə raməmhū raməfo mamō nətərigien səvənhi raməpwəmwis mameitenhi nəveginien amasan sə rutə pehe ia tīprənə. Ko rīpkesi akwauakw mhə, mətə tro nətərigien səvənhi rəpwəmwis meste nesən kupwən rauər nənə məkʷə me nepwīn həuvehe mhəkurau nənə nesən sə ro kəru irə rauər mwi. ⁸ Kímiaha mwi tihaməkeikei mho nətərigien səkímiaha rəpwəmwis mīskai tī nəri nə mə nuveheien səvəi Iərimənu səkítaha ruvəuvehe ipaka. ⁹ Piak me, kímiaha tihəpwəh nīni ərəhaien kímiaha me kamo Kumwesən rərpwīn noien ərəha me səkímiaha. Hətə ro! Iəmə sə trərpwīn noien ərəha me səvəi nərmama ruvəuvehe ipaka. Ramərer a ia kwəruə. ¹⁰ Piak me, rerímiaha tramrhi profet me nəha fwe kupwən haməgkiari ia nəghi Iərimənu. Nəpīn kamo nəmisəien mīnraha, ho nətərigien səvənraha rəpwəmwis. ¹¹ Ia nətəien səkítaha nərmama səməme kamhərer əknekin ia nahatətəien səvənraha ia nəpīn me Kumwesən ramo irəha hamagien. Kímiaha hiəuvəregi raka noien səvəi Jop. Nəpīn ramarə ia nəmisəien me rīpik, rərer əknekin ia nahatətəien səvənhi. Nənə hiənətə raka nəfe Iərimənu rīno mīn kurirə ikīn. Iərimənu rerīn ramərkwəpīr pīk tī nərmama. In ramapi tī nirəha.

Kímiaha tihəpwəh nakutanien ia nəgkiariien me

5:7: Luk 21:19, Dut 11:14, Jer 5:24, Joel 2:23 **5:8:** Rom 13:11-12, Hip 10:25, 1Tes 4:7 **5:9:** Mat 24:33 **5:11:** Eks 34:6, Sam 103:8, Sam 111:4

¹² Mætə piak me, irənhə ia narimnari me pam, trini minuə kيمياha hiəni promes riti tihəpwəh nakutanien ia nəgkiariien səkimiaha mə tiho nərmama hətoni kيمياha hiaməni pərhiən. Tihəpwəh niniien nitətə ia neiai uə tiprənə i uə nari riti mwi mə tiho noien nəha. Mətə trini minuə hiəsəni nari riti, tihəni a mhəsəni mə “Ouəh.” Trini minuə hiəpkəsəni mhə nari riti, tihəni a mə “Rekəm.” Mə kيمياha hiaməgkiari əpnəpən, Kumwesən trərpwin noien ərəha səkimiaha.

Nəfwakiien sə ramo nīpwran

¹³ Rəfo? Riti ia kيمياha raməmisə? Ramasan mə rəfwaki. Riti ia kيمياha rerin ramagien? Ramasan mə rəni nīpu, məgnəgini Kumwesən. ¹⁴ Riti ia kيمياha raməmhə? Ramasan mə rəkwein elta me səvəi nəfwakiien pwəh irəha hətəgi pen oel irə ia nəghi lərimənu mhəfwaki tukwe. ¹⁵ Nənə nəfwakiien səvəi nərmama səməme kamhahatətə ia Kumwesən truvehimiru iərmama sə raməmhə. lərimənu tromasan iərmama nəha. Trini minuə iərmama nəha rino noien ərəha me, lərimənu trenouenou noien ərəha me nəha məpwəh nərpwinien. ¹⁶ Ro iaminihi irə kيمياha tihəni pen tukumiaha me i noien ərəha me səməme hiəno, nənə mhəfwaki tukumiaha me mə Kumwesən tro kيمياha hiəuvehe mhəsənin. Nəpin iərmama sə ramo noien atukwatukw raməfwaki, nəfwakiien səvəhi nəgsen rasori mamə nīpwran. ¹⁷ Profet Elaeja in iərmama rəmwhen a ia kitaha. Rəfwaki skai mə nesən trəpwəh nauərien. Nənə nesən rīpkauər mhə ia tənə nəha nuk kahar məkwə

sikis. ¹⁸ Nənə kurirə ikin rəfwaki mwi, nənə nesən rukrutə ia nimagouagou, kwənkwai narimnari me həutə mwi ia tīprənə.

Iərmama sə rəruei

¹⁹ Piak me, trini minuə kimiaha riti rəpwəh nəgkiariien sə ro nīpərhiēnien məruei, nənə kimiaha riti mwi riri in mīrərig, ²⁰ iakokeikei mə rerimīaha tramrhi nəri i. Iərmama sə ramiri raka iəmə ərəha ia suatuk sə raməruei irə mīrərig, in rauvehimīru iəmə ərəha nəha mə trəpwəh nemhəien. Kumwesən trenouenou noien ərəha me həpik səvəi iəmə ərəha nəha, məpwəh nəripwinien.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416